



## SLUŽBA ZA REVIZIJU FINANSIRANJA POLITIČKIH STRANAKA

Na osnovu člana 10. stav (1) Zakona o finansiranju političkih stranaka («Službeni glasnik BiH» broj 95/12), člana 24. Pravilnika o godišnjim finansijskim izvještajima političkih stranaka («Službeni glasnik BiH» broj 61/06) i člana 18. Pravilnika o administrativnim procedurama pregleda, kontrole i revizije finansijskih izvještaja političkih stranaka («Službeni glasnik BiH» broj 103/08), izdajem

### IZVJEŠTAJ O REVIZIJI GODIŠNJEG FINANSIJSKOG IZVJEŠTAJA ZA 2011. GODINU **HRVATSKE STRANKE PRAVA BOSNE I HERCEGOVINE**

Broj: 03-07-6-450/12  
Sarajevo, 15. april 2013. godine

## SADRŽAJ:

MIŠLJENJE .....	3
1. UVOD .....	4
2. PREDSTAVLJANJE POLITIČKE STRANKE .....	4
3. OPIS REVIZIJE .....	5
Predmet revizije .....	5
Cilj revizije .....	5
Obim revizije .....	5
4. PRETHODNE REVIZIJE .....	5
5. NALAZI I PREPORUKE .....	6
5.1. NALAZI .....	6
5.2. PREPORUKE .....	11

## MIŠLJENJE

Služba za reviziju finansiranja političkih stranaka izvršila je reviziju godišnjeg finansijskog izvještaja Hrvatska stranka prava Bosne i Hercegovine za 2011. godinu.

Rukovodstvo stranke je odgovorno za finansijske izvještaje, postupanje u skladu sa zakonima i propisima i uspostavljanje efikasnog sistema internih kontrola.

Naša odgovornost je da izrazimo mišljenje na osnovu revizije koju smo izvršili.

Reviziju smo obavili u skladu sa revizijskim standardima. Ovi standardi zahtijevaju da reviziju planiramo i izvršimo na način da prikupimo dovoljno dokaza koji nam, u razumnoj mjeri, pružaju garancije da je stranka postupala u skladu sa odredbama tada važećeg Zakona o finansiranju političkih stranaka ("Službeni glasnik BiH" br. 22/00, 102/09 i 54/10)<sup>1</sup> – u daljem tekstu: Zakon o finansiranju.

Revizija je na osnovu uzoraka ispitivala značajne transakcije koje potvrđuju iznose u finansijskim izvještajima, ocjenu računovodstvenih načela prilikom sastavljanja finansijskih izvještaja i postupanje u skladu sa odredbama Zakona o finansiranju.

Smatramo da revizija koju smo izvršili pruža razumnu osnovu za izražavanje našeg mišljenja.

**Utvdili smo da Hrvatska stranka prava Bosne i Hercegovine u izvještajnom periodu nije postupila u skladu sa odredbama člana 11. stav (1) i stav (3) Zakona o finansiranju.**

**Prema našem mišljenju, osim navedenog, revidirani finansijski izvještaj ukazuje da je Hrvatska stranka prava Bosne i Hercegovine u 2011. godini postupala u skladu sa odredbama Zakona o finansiranju.**

---

<sup>1</sup> Dana 5.12.2012. godine stupio je na snagu novi Zakon o finansiranju političkih stranaka ("Službeni glasnik BiH" br. 95/12).

## 1. UVOD

Služba za reviziju finansiranja političkih stranaka izvršila je reviziju godišnjeg finansijskog izvještaja Hrvatske stranke prava Bosne i Hercegovine za 2011. godinu.

Revizija je preduzeta u skladu sa članom 10. stav (1) Zakona o finansiranju političkih stranaka, članom 24. Pravilnika o godišnjim finansijskim izvještajima političkih stranaka i članom 2. Pravilnika o administrativnim procedurama pregleda, kontrole i revizije finansijskih izvještaja političkih stranaka.

Zbog činjenice da se revizija obavlja provjerama na bazi uzorka i da postoje ograničenja u računovodstvenom sistemu i sistemu internih kontrola, postoji mogućnost da pojedine materijalno značajne greške ne budu otkrivene.

Prema podacima iz godišnjeg finansijskog izvještaja Hrvatska stranka prava Bosne i Hercegovine ostvarila je ukupne prihode u iznosu od 214.944,37 KM, čija struktura je data u sljedećoj tabeli:

Red.br.	Vrsta prihoda	Iznos u KM	Učešće u uk.prih. %
1	Članarina	0,00	0,00%
2	Prilozi fizičkih lica	5.671,38	2,64%
3	Prilozi pravnih lica	0,00	0,00%
4	Prihodi od imovine	5,75	0,00%
5	Prihodi od pr.lica	0,00	0,00%
6	Prihodi od poklona	0,00	0,00%
7	Prihodi iz budžeta	209.267,24	97,36%
	Ostali prihodi	0,00	0,00%
	<b>Ukupni prihodi:</b>	<b>214.944,37</b>	<b>100,00%</b>

U godišnjem finansijskom izvještaju politička stranka je iskazala ukupne rashode u iznosu od 204.967,38 KM.

## 2. PREDSTAVLJANJE POLITIČKE STRANKE

Naziv političke stranke: Hrvatska stranka prava Bosne i Hercegovine. Skraćeni naziv stranke je HSP BiH.

Hrvatska stranka prava Bosne i Hercegovine je upisana u registar Kantonalnog suda Kantona 10 Livno, rješenjem broj: R-11/04 od 05.05.2004. godine. Dana 03.06.2004. godine, rješenjem Kantonalnog suda Kantona 10 Livno upisana je izmjena naziva stranke u Hrvatska stranka prava Bosne i Hercegovine-Đapić- dr.Jurišić, odnosno rješenjem Općinskog suda u Mostaru broj: R/7-07 od 24.07.2007. godine izmjena naziva i sjedišta stranke. Rješenjem Općinskog suda u Mostaru broj: R/9-07 od 23.01.2008. godine upisana su lica za predstavljanje i zastupanje stranke.

Dana 18.03.2010. godine rješenjem Općinskog suda u Mostaru broj: R/2-10 upisana je izmjena naziva stranke, koji sada glasi: "Hrvatska stranka prava Bosne i Hercegovine".

Rješenjem Općinskog suda Mostar, broj: R/3-11 od 21.02.2012. godine, u Registar političkih organizacija-stranaka Općinskog suda Mostar upisano je Udruživanje političkih stranaka Hrvatski demokršćani i Hrvatsko zajedništvo Herceg-Bosne u političku stranku Hrvatska stranka prava Bosne i Hercegovine, koja je pravni sljednik ovih stranaka.

Sjedište političke stranke je u Mostaru, ulica Kneza M.V. Humskog br. 39.

Lica ovlaštena za zastupanje stranke su: dr. Zvonko Jurišić, predsjednik i dr. Josip Perić, zamjenik predsjednika.

Ovlašteno lice za podnošenje finansijskih izvještaja u 2011. godini je Krasnodar Vasić.<sup>2</sup>

Prema podacima iz godišnjeg finansijskog izvještaja za 2011. godinu, Hrvatska stranka prava Bosne i Hercegovine nema niže nivoe organizovanja (entitetske, kantonalne, opštinske).<sup>3</sup>

### **3. OPIS REVIZIJE**

**Predmet revizije** je godišnji finansijski izvještaj Hrvatske stranke prava Bosne i Hercegovine za 2011. godinu.

**Cilj revizije** je da revizoru omogući da izrazi mišljenje o tome da li je Hrvatska stranka prava Bosne i Hercegovine u izvještajnom periodu postupala u skladu sa odredbama Zakona o finansiranju.

**Obim revizije** finansijskih izvještaja Hrvatske stranke prava Bosne i Hercegovine obuhvata kontrolu i provođenje analitičkih procedura radi utvrđivanja usklađenosti podataka koje je stranka iskazala u finansijskom izvještaju sa odredbama Zakona o finansiranju, odnosno usklađenosti izvora finansiranja i načina trošenja sredstava, sa posebnim naglaskom na prihode iz budžeta.

### **4. PRETHODNE REVIZIJE**

Služba za reviziju je obavila reviziju i pregled finansijskih izvještaja Hrvatske stranke prava Bosne i Hercegovine za period od 2006. do 2010. godine, nakon čega su izdati izvještaji o reviziji, odnosno izvještaji o pregledu sa mišljenjem revizora, nalazima revizije i preporukama.

Nakon izvršenog pregleda za 2010. godinu, Služba za reviziju je izdala Izvještaj o pregledu godišnjeg finansijskog izvještaja Hrvatske stranke prava Bosne i Hercegovine sa mišljenjem revizora, nalazima revizije i preporukama da stranka treba postupati u skladu sa odredbama 6. stav (2), člana 8. stav (1) i stav (2), člana 11. stav (1), stav (2) i stav (3) Zakona o finansiranju i člana 15.1 stav (1) Izbornog zakona BiH.

#### **Nerealizovane preporuke:**

Na osnovu uočenih nedostataka u godišnjem finansijskom izvještaju za 2011. godinu, utvrđeno je da Hrvatska stranka prava Bosne i Hercegovine nije ispoštovala preporuke iz Izvještaja o pregledu godišnjeg finansijskog izvještaja za 2010. godinu, odnosno i dalje postupa suprotno odredbama člana člana 11. stav (1) i stav (3) Zakona o finansiranju.

---

<sup>2</sup> HSP BiH je u obrascu 1 navela da je ovlašteno lice za finansijske izvještaje Ante Soldo.

<sup>3</sup> Revizijom je utvrđeno da je HSP BiH u 2011. godini imala niže organizacione odbore.

## 5. NALAZI I PREPORUKE

### 5.1. NALAZI

**Na osnovu obavljene revizije godišnjeg finansijskog izvještaja za 2011. godinu , utvrđeno je da je Hrvatska stranka prava Bosne i Hercegovine prekršila odredbe člana 11. stav (1) i stav (3) Zakona o finansiranju.**

Na osnovu obavljene revizije godišnjeg finansijskog izvještaja za 2011. godinu, utvrđeno je da stranka nije vodila potpune evidencije o svojim rashodima i obavezama i da godišnji finansijski izvještaj nije popunila u skladu sa Pravilnikom o godišnjim finansijskim izvještajima političkih stranaka, čime su prekršene odredbe člana 11. stav (1) i stav (3) Zakona o finansiranju.

(1) Na osnovu obavljene revizije godišnjeg finansijskog izvještaja za 2011. godinu, utvrđeno je da stranka nije vodila potpune evidencije o svojim rashodima i obavezama, čime su prekršene odredbe člana 11. stav (1) Zakona o finansiranju.

Hrvatska stranka prava Bosne i Hercegovine svoje poslovanje obavlja putem jednog transakcijskog računa i poslovne knjige vodi na nivou stranke. Međutim, HSP BiH u okviru svojih poslovnih knjiga nije uspostavila evidencije po organizacionim dijelovima stranke, čime nisu stvoreni preduslovi za finansijsko izvještavanje u skladu sa Pravilnikom o godišnjim finansijskim izvještajima političkih stranaka.

Na osnovu konfirmacija dobavljača i uvidom u analitička konta troškova i obaveza, utvrđeno je da Hrvatska stranka prava Bosne i Hercegovine rashode nije evidentirala u momentu nastanka obaveze, već u momentu plaćanja obaveza, tako da ni troškovi ni obaveze koje su iskazane u poslovnim knjigama ne odgovaraju stvarnom stanju.

Revizijom je, takođe, utvrđeno da stranka nije pravilno uspostavila blagajničko poslovanje, odnosno da nalozi uplate i isplate nisu potpisani, kao i da računi nisu ovjereni za isplatu od strane ovlaštenog lica stranke.

- Uvidom u poslovne knjige za 2011. godinu, utvrđeno je da je HSP BiH evidentirala rashode po Sudskoj nagodbi od 23.05.2011. godine u iznosu od 17.727,75 KM, iako su rashodi u skladu sa ovom nagodbom iznosili 95.455,50 KM<sup>4</sup>.

- Hrvatska stranka prava Bosne i Hercegovine nije u svojim poslovnim knjigama pravilno evidentirala troškove zakupa za prostorije koje koriste Središnji ured i niži organizacioni odbori stranke.

Osim troškova zakupa, HSP BiH nije u svojim poslovnim knjigama evidentirala ni troškove komunalne naknade u iznosu od 1.198,08 KM<sup>5</sup>.

- Revizijom je utvrđeno da je stranka u 2011. godini platila i u poslovnim knjigama za 2011. godinu evidentirala i troškove po računima iz 2010. godine. Tako su evidentirani troškovi po

---

<sup>4</sup> Detaljnije- Vidjeti nalaz pod (10)

<sup>5</sup> Akt Grada Mostara broj: 05/1-16-13923/12 od 03.01.2013. godine.

računima za kampanju u ukupnom iznosu od 6.762,60 KM<sup>6</sup>, odnosno troškovi goriva i reprezentacije.

- Hrvatska stranka prava Bosne i Hercegovine je u svojim poslovnim knjigama i godišnjem finansijskom izvještaju za 2011. godinu iskazala troškove goriva u ukupnom iznosu od 15.344,52 KM.

Troškovi goriva su u poslovnim knjigama evidentirani na osnovu naloga isplate sa blagajne, odnosno računa za gorivo. Uvidom u blagajničke izvještaje i naloge isplate utvrđeno je da računi nisu ovjereni od strane ovlaštenog lica stranke za isplatu i da nalozi isplate nisu ispravni za knjiženje u poslovnim knjigama. Naime, na nalogima isplate nije navedeno kome su sredstva isplaćena i ne sadrže potpis primaoca i isplatioca (blagajnika).

Revizijom je utvrđeno da su isplate iz blagajne po osnovu utrošenog goriva vršene samo na osnovu računa za gorivo na osnovu kojih nije moguće utvrditi mjesto i svrhu putovanja, odnosno da je trošak nastao u svrhu obavljanja stranačkih poslova.<sup>7</sup>

Takođe je utvrđeno da je HSP BiH naloge za službena putovanja izdavala samo predsjedniku stranke.

Uvidom u Popisnu listu osnovnih sredstava na dan 31.12.2011. godine i poslovne knjige HSP BiH, nije utvrđeno da HSP BiH u svom vlasništvu ima vozila.

Imajući u vidu da stranka ne posjeduje vozila, kao i da na osnovu raspoložive dokumentacije nije moguće utvrditi da su troškovi goriva nastali u svrhu obavljanja stranačkih poslova, Hrvatska stranka prava Bosne i Hercegovine je na sva isplaćena sredstva za koja ne posjeduje adekvatnu dokumentaciju<sup>8</sup>, u skladu sa poreskim propisima, kao na lična primanja, imala obavezu izvršiti obračun poreza na dohodak i pripadajuće doprinose.

Iz svega navedenog slijedi da troškovi i obaveze po osnovu poreza na dohodak i pripadajućih doprinosa na isplaćena sredstva fizičkim licima po računima za gorivo nisu iskazani u poslovnim knjigama i godišnjem finansijskom izvještaju stranke.

- (2) Uvidom u obrazac 1 (opšti podaci o političkoj stranci) godišnjeg finansijskog izvještaja, utvrđeno je da HSP BiH nije iskazala podatke o broju rješenja i datumu registracije političke stranke u registru suda, odnosno nije navela tačne podatke o licu ovlaštenom za podnošenje finansijskih izvještaja, čime je prekršila odredbe člana 9. Pravilnika o godišnjim finansijskim izvještajima političkih stranaka.
- Naime, HSP BiH je u obrascu 1 navela da je Ante Soldo ovlašteno lice za podnošenje finansijskih izvještaja, dok je prema podacima koje je stranka dostavila u toku obavljanja revizije, ovlašteno lice za podnošenje finansijskih izvještaja Krasnodar Vasić.<sup>9</sup>

<sup>6</sup> Rn. "Atelier-Jukić" doo Posušje br. 1509-2010-282 od 22.09.2010. godine u iznosu od 5.826,60 KM i rn. "Kreativni mediji" doo Posušje br. 13/11 od 05.01.2011. godine u iznosu od 936,00 KM (za emitovanje promidžbenih spotova u periodu od 08.09.-01.10.2010. godine).

<sup>7</sup> Blagajnički izvještaj na dan 31.03.2011. godine (isplata 25) na iznos od 581,16 KM.

<sup>8</sup> Nalozi za službena putovanja iz kojih je moguće utvrditi ime i prezime, funkciju u stranci, vrijeme, mjesto i svrhu putovanja, kao i obračun troškova.

<sup>9</sup> Dopis HSP BiH broj: 01-004-13 od 11.01.2013. godine i Odluka o imenovanju ovlaštenog lica za finansijske izvještaje, broj: PS-001/05/08 od 21.05.2008. godine.

- (3) Uvidom u godišnji finansijski izvještaj za 2011. godinu utvrđeno je da je HSP BiH ostvarila prihode iz budžeta tri (3) kantona i dvanaest (12) opština, što ukazuje da osim Središnjeg ureda Hrvatska stranka prava Bosne i Hercegovine ima i niže organizacione odbore. Takođe, na osnovu izjave Hrvatske stranke prava Bosne i Hercegovine koja je dostavljena 21.12.2012. godine, utvrđeno je da stranka ima pet (5) županijskih odbora i podružnice u opštinama.

Obzirom da je HSP BiH u obrascu 1-1 (organizaciona struktura političke stranke) navela samo Središnji ured, odnosno da nije navela niže organizacione odbore, prekršene su odredbe člana 11. Pravilnika o godišnjim finansijskim izvještajima političkih stranaka.

- (4) Uvidom u obrazac 2 (pregled prometa svih transakcijskih računa) godišnjeg finansijskog izvještaja za 2011. godinu, utvrđeno je da je stranka iskazala da na transakcijskom računu u Hypo Alpe Adria bank na dan 31.12.2011. godine ima sredstva u iznosu od 17,02 KM. Prema podacima iz Izvještaja o računima pravnih lica koji se vodi u Jedinostvenom registru transakcijskih računa u Bosni i Hercegovini<sup>10</sup>, utvrđeno je da je transakcijski račun u Hypo Alpe Adria bank ugašen 2010. godine, što je stranka u postupku revizije i potvrdila. Isto tako je utvrđeno da HSP BiH saldo na ovom transakcijskom računu u iznosu 17,02 KM iskazuje u svojim poslovnim knjigama i na dan 31.12.2011. godine.

Dakle, na osnovu svega navedenog slijedi da je stranka suprotno odredbama člana 12. Pravilnika o godišnjim finansijskim izvještajima političkih stranaka u obrascu 2 godišnjeg finansijskog izvještaja za 2011. godinu iskazala transakcijski račun koji je ugašen u 2010. godini.

- (5) Revizijom je utvrđeno da HSP BiH u godišnjem finansijskom izvještaju nije pravilno iskazala prihode iz budžeta, čime su prekršene odredbe člana 19. Pravilnika o godišnjim finansijskim izvještajima političkih stranaka. Uvidom u obrazac 3-f (Prihodi iz budžeta) utvrđeno je da je stranka iskazala prihode iz budžeta Zapadno-Hercegovačkog kantona u iznosu od 27.000,00 KM, dok je prema podacima sa izvoda transakcijskog računa primila sredstva u iznosu od 29.250,00 KM. Takođe je utvrđeno da je stranka iz budžeta Općine Grude primila sredstva u iznosu od 2.250,00 KM, dok je u obrascu 3-f godišnjeg finansijskog izvještaja za 2011. godinu iskazala prihode u iznosu od 4.500,00 KM.

- (6) Uvidom u godišnji finansijski izvještaj za 2011. godinu, utvrđeno je da je Hrvatska stranka prava Bosne i Hercegovine suprotno odredbi člana 7. stav (2) Pravilnika o godišnjim finansijskim izvještajima političkih stranaka, obrasce 4-1 (režijsko-administrativni i ostali troškovi) i 4-2 (troškovi propagande) dostavila na nivou stranke, tj. za Središnji ured. U skladu sa članom 7. stav (2) Pravilnika o godišnjim finansijskim izvještajima političkih stranaka, finansijski izvještaj na nivou stranke podnosi se na obrascima 1, 1-1, 2, 2-1, 3, 3-f, 4 i 5, a za organizacione dijelove stranke na ostalim obrascima (3-a, 3-b, 3-c, 3-d, 3-e, 4-1 i 4-2), i to posebno za svaki organizacioni dio političke stranke.

- (7) HSP BiH nije u obrascu 4-1 (režijsko-administrativni i ostali troškovi) iskazala sve troškove, čime je prekršila odredbe člana 21. Pravilnika o godišnjim finansijskim izvještajima političkih stranaka.

Naime, uvidom u ugovor o zakupu, poslovne knjige stranke i podatke koje je dostavio Grad Mostar, utvrđeno je da HSP BiH u svojim poslovnim knjigama nije evidentirala, odnosno u

---

<sup>10</sup> Centralna banka Bosne i Hercegovine.



godišnjem finansijskom izvještaju nije iskazala troškove zakupa za poslovne prostorije koje je koristio Središnji ured, u iznosu od 1.413,95 KM.<sup>11</sup>

(8) Na osnovu dodatne finansijske dokumentacije, utvrđeno je da HSP BiH nije u svojim poslovnim knjigama a ni u godišnjem finansijskom izvještaju iskazala sve troškove zakupa za poslovne prostorije koje su koristili sljedeći odbori stranke:

- Opštinski odbor HSP BiH Široki Brijeg nije iskazao troškove zakupa u iznosu od 1.200,00 KM. Naime, prema odredbama ugovora o zakupu, mjesečna zakupnina za poslovne prostorije koje je koristio ovaj odbor je iznosila 100,00 KM, odnosno 1.200,00 KM za 2011. godinu. Stranka u godišnjem finansijskom izvještaju nije iskazala troškove zakupa za ovaj poslovni prostor.

- Troškovi zakupa poslovnog prostora koji je koristio Opštinski odbor HSP BiH Čitluk iskazani su za 2.000,00 KM manji u odnosu na ostvarene.

Prema ugovoru o zakupu, zakup poslovnog prostora za 2011. godinu je iznosio 2.400,00 KM. Stranka je u svojim poslovnim knjigama evidentirala samo troškove u iznosu od 400,00 KM, a ne 2.400,00 KM, koliko su troškovi zakupa u 2011. godini iznosili.

- Prema ugovoru o zakupu poslovnog prostora koje je koristio KO HSP BiH Odžak, zakupnina za 2011. godinu je iznosila 2.000,00 KM. Uvidom u poslovne knjige, utvrđeno je da je HSP BiH u poslovnim knjigama za 2011. godinu evidentirala troškove zakupa za ove prostorije u iznosu od 500,00 KM.

Kontrolom je utvrđeno da HSP BiH nije u svojim poslovnim knjigama evidentirala troškove zakupa u iznosu od 1.500,00 KM, odnosno da su troškovi zakupa u finansijskom izvještaju manje iskazani za 1.500,00 KM.

- Uvidom u poslovne knjige Središnjeg ureda, utvrđeno je da su troškovi zakupa poslovnih prostorija koje je koristio OO HSP BiH Novi Travnik proknjiženi u iznosu od 1.350,00 KM. Prema odredbama Ugovora o zakupu, ovaj odbor je koristio prostorije fizičkog lica u periodu od 01.01.2011.-31.10.2011. godine uz mjesečni zakup u iznosu od 150,00 KM, odnosno 1.500,00 KM za 2011. godinu.

Dakle, utvrđeno je da su troškovi zakupa za poslovne prostorije koje je koristio ovaj odbor iskazani za 150,00 KM manji u odnosu na ostvarene.

(9) Revizijom je utvrđeno da stranka na dan 31.12.2011. godine ima obaveze prema Gradu Mostaru po osnovu komunalne naknade u iznosu od 4.093,44 KM.<sup>12</sup>

Uvidom u analitičku karticu potraživanja koju je dostavio Grad Mostar, utvrđeno je da Hrvatska stranka prava Bosne i Hercegovine u svojim poslovnim knjigama nije evidentirala troškove komunalne naknade za 2011. godinu u iznosu od 1.198,08 KM, odnosno da nema evidentirane obaveze u ukupnom iznosu od 4.093,44 KM.

(10) U skladu sa zaključenom Sudskom nagodbom od 23.05.2011. godine između HSS-NHI i Hrvatske stranke prava Bosne i Hercegovine, obaveze HSP BiH na dan 23.05.2011. godine prema HSS-NHI su iznosile 95.455,50 KM.

Ovom nagodbom je utvrđeno da Hrvatska stranka prava Bosne i Hercegovine dug prema HSS-NHI izmiri u tri rate, i to: iznos od 35.455,50 KM do 15.10.2011. godine, iznos od 30.000,00 KM do 01.09.2012., i iznos od 30.000,00 KM do 01.09.2013. godine.

---

<sup>11</sup> Račun za juli 2011. godine.

<sup>12</sup> Obaveze po osnovu komunalne naknade na dan 31.12.2010. odnosno 01.01.2011. godine iznose 2.895,36 KM.

Uvidom u poslovne knjige i godišnji finansijski izvještaj utvrđeno je da je HSP BiH u 2011. godini evidentirala troškove po ovom osnovu samo u iznosu od 17.727,45 KM, tj. u iznosu sredstava koje je i platila HSS-NHI u 2011. godini.

Na osnovu navedenog, Služba za reviziju je utvrdila da su troškovi u poslovnim knjigama i finansijskom izvještaju iskazani za 77.727,74 KM manji u odnosu na ostvarene u 2011. godini.

- (11) HSP BiH nije iskazala obaveze na dan 31.12.2011. godine u obrascu 5 godišnjeg finansijskog izvještaja, čime je postupila suprotno odredbama člana 23. Pravilnika o godišnjim finansijskim izvještajima političkih stranaka.

Prema podacima iz poslovnih knjiga, obaveze Hrvatske stranke prava Bosne i Hercegovine na dan 31.12.2011. godine su iznosile ukupno 172.686,88 KM, od čega su obaveze prema dobavljačima 171.887,48 KM.

Obzirom da HSP BiH nije svoje rashode pravilno evidentirala u poslovnim knjigama, tako ni obaveze iskazane u poslovnim knjigama ne odgovaraju stvarnom stanju, tj. obaveze su iskazane manje u odnosu stvarne.

Kao što je u prethodnim nalazima navedeno, HSP BiH u svojim poslovnim knjigama nije evidentirala obaveze prema HSS-NHI, odnosno nije u godišnjem finansijskom izvještaju iskazala obaveze prema HSS-NHI u iznosu od 77.727,75 KM<sup>13</sup>.

Takođe, utvrđeno je da je Hrvatska stranka prava Bosne i Hercegovine u svojim poslovnim knjigama na dan 31.12.2011. godine iskazala obaveze prema Gradu Mostaru u iznosu od 12.725,55 KM, dok je revizijom utvrđeno da obaveze HSP BiH prema Gradu Mostaru na dan 31.12.2011. godine iznose 18.232,94 KM<sup>14</sup>.

---

<sup>13</sup> HSP BiH u skladu sa Sudskom nagodbom, na dan 23.05.2011. godine imala obaveze prema HSS-NHI u ukupnom iznosu od 95.455,50 KM, od čega je u 2011. godini izmirila 17.727,74 KM. – Detaljnije u nalazu pod (10)

<sup>14</sup> Obaveze po osnovu zakupa poslovnog prostora 14.139,50 KM i obaveze za komunalnu naknadu 4.093,44 KM

## 5.2. PREPORUKE

*Preporučuje se Hrvatskoj stranci prava Bosne i Hercegovine da se pridržava odredaba Zakona o finansiranju političkih stranaka, a posebno na osnovu uočenih nedostataka se preporučuje:*

- *da vodi evidencije o svojim prihodima i rashodima, i*
- *da finansijske izvještaje koje podnosi Centralnoj izbornoj komisiji BiH popunjava u skladu sa Pravilnikom o godišnjim finansijskim izvještajima političkih stranaka.*

*Takođe, preporučuje je stranci:*

- *da prihode i rashode priznaje u momentu njihovog nastanka, a ne u momentu naplate ili plaćanja,*
- *da u skladu sa Zakonom o računodstvu i reviziji FBiH redovno obavlja popis imovine i obaveza sa stanjem na dan 31.12.,*
- *da, u što kraćem roku, utvrdi stvarno stanje svojih obaveza i izvrši odgovarajuća knjiženja u svojim poslovnim knjigama, i*
- *da ustroji upravljanje gotovinom putem blagajne i uvede obavezu vođenja blagajničkih izvještaja na dnevnom nivou uz obavezne priloge (nalog uplate i nalog isplate; dokumenta na osnovu kojih se vrše isplate putem blagajne kao što su npr. putni nalozi). Poslovanje blagajne treba urediti tako da se razgraniče dužnosti odobravanja isplate, evidentiranja i isplate gotovine uz prethodno definisanje visine blagajničkog maksimuma<sup>15</sup>.*

### **KOMENTAR:**

U ostavljenom roku, Hrvatska stranka prava Bosne i Hercegovine nije dostavila primjedbe na Preliminarni izvještaj o reviziji godišnjeg finansijskog izvještaja za 2011. godinu.

Zahvaljujemo se ovlaštenoj osobi za finansijske izvještaje u Središnjem uredu Hrvatske stranke prava Bosne i Hercegovine na dobroj i korektnoj saradnji tokom obavljanja revizije finansijskih izvještaja.

Hasida Gušić, šef Službe za reviziju

Sanja Tošović, revizor

Anela Burdžović-Kapić, pomoćnik revizora

---

<sup>15</sup> Blagajnički izvještaji se sačinjavaju mjesečno. Blagajnički dnevnic-i izvještaji, nalozi isplate i naplate nisu potpisane od strane blagajnika. Putem blagajne su isplaćeni i računi koji formalno nisu ispravni jer ne sadrže broj i datum izdavanja. Računi prije isplate i knjiženja nisu ovjereni od strane odgovorne osobe.